



李 文

江苏工业学院图书馆

藏书章

鐵 鈔

署 寶


君

李鐵君先生文鈔叙

鐵嶺李鐵君先生爲遼東三老人之一以詩鳴於雍乾之盛所著之詩初名含中集後易名隄集集刊行已久近年吳興劉氏更取而覆刊之嗣以其版歸瀋陽傳本旣多幾於家有其書獨其文集迄未之見曩者長洲沈氏撰國朝詩別裁集謂先生著有多青山人集或即詩文集之總名其後盛伯熙祭酒與吾邑楊雪橋太守合纂八旗文經最錄先生之文凡七十一首未言采自何書八九年前陳慈首孝廉於燕京書肆購得先生文鈔一冊作宋體書遂贈於袁公潔珊余假而讀之所鈔凡二十六首中有六首爲文經所無一壽知薊州事錢容齋序二周七峯詩序三明常開平祠堂記四東園菊讌記五千像寺石碣記六重建東竺庵碑記所得雖少亦碩果之僅存矣鈔本與文經同者僅二十首不及文經所錄三之一茲以文經著錄之文爲主而以鈔本之六篇附益之又別覓得菊譜序一首都七十八首

其各體次第亦依文經名曰李鐵君先生文鈔於是先生之文乃得與詩集並傳焉嘗謂文章之精者每與天地同流夫僅以鈔本流傳歷二百年而未之損滅若非冥冥中有鬼神爲之守護亦曷克臻此矧先生以遼東世族不爲名疆利網所縛隱居終身澹泊明志此固爲畢生精力所萃又何可以不傳耶余生也晚遠緬前型輒爲之低徊不置吾鄉人士得讀是集其必有聞風興起者矣甲戌八月遼陽

金毓黻叙

李鐵君先生文鈔目錄

卷上

賦

景陵九芝賦

有序

八旗文經

擬西征凱旋賦

有序

同上

太學石鼓賦

同上

焦螟賦

同上

紫瓊巖賦

同上

齊陰陽賦

同上

吉慶草賦

同上

青麟賦

同上

論

伍員諫平越論

八旗文經

三史論 同上

漸離論 同上

理數論 同上

武庚論 同上

說

飼牛說 八旗文經

蠅說 同上

序

春秋通義自序 八旗文經

原易自序 同上

尚史序傳 同上

陳氏譜系序 同上

馬司寇集序 同上

隄巢後集自序

同上

石東邨詩序

同上

祝豫堂詩序

同上

陳石閭詩序

同上

溯源堂詩序

同上

汪青連維碩二君詩序

同上

陳石閭選詩序

同上

周七峯詩序

鈔本

秋明主人菊譜序

自菊譜鈔出

贈序

送陳橘洲之古北口序

八旗文經

贈唐青照序

同上

贈藏山上人序

同上

壽知薊州事錢容齋序

鈔本

跋

金魯山別駕全城圖跋

八旗文經

題友人邊事後

同上

鎮安將軍馬公告身跋

同上

題殉硯說後

同上

題載竹圖

同上

卷下

表

擬詔錄八旗漢軍舊家子弟羣臣謝表

八旗文經

書

辭薦舉詞科與友人書

八旗文經

與王蘭谷書

同上

上濟齋夫子書 同上

與王蘭谷書二 同上

上望溪侍郎書 同上

與陳橘洲書 同上

上濟齋夫子書二 同上

報王蘭谷書 同上

與陳直公隱君書 同上

記

廬青山堂記 八旗文經

梅子鵬記 同上

倒景潭記 同上

牯牛精舍記 同上

樗移小記爲納蘭克明作 同上

是亦樓記

同上

沆泉記

同上

高寄亭記

同上

卜研記

同上

東園菊讌記

鈔本

千像寺石碣記

同上

重建東竺庵碑記

同上

明常開平祠堂記

同上

贈忠武將軍周公碑記

八旗文經

頌

青麟頌

八旗文經

贊

雷孝子贊

八旗文經

墓表

資政大夫輕車都尉參領衛唐李公三世墓表 八旗文經

弼公王翁墓表 同上

塔銘

法天禪師生塔銘 并序 附 八旗文經

傳

焦明子傳 八旗文經

馬山人傳 同上

孝僧傳 同上

張翬傳 同上

楊成義傳 同上

李處士傳 同上

洪陔華傳 同上

二陳生傳

同上

少司馬宗室塞公家傳

同上

石綱菴制府家傳

同上

傅閣峯尙書家傳

同上

李鐵君文鈔目錄

李鐵君先生文鈔卷上

鐵嶺李 鎔 撰

賦

景陵九芝賦

有序

竊聞大孝昭乎天帝報靈明之貺至仁廣洽地祇兆赫弈之徵每協
瑞於河山必標奇於草木神區無外毓有其方陽德唯純歸符厥數
伏惟皇帝陛下樞機化育經緯陰陽濡閔澤以無言羣生允殖播惠
風於至隱六合同春是故幽感明通萃四靈而在囿中誠外順輯羣
瑞以充庭乃十有二年冬十月神芝九本產於景陵之次焉謹按班
固通德論曰王者德至山陵則芝實茂蓋以朱萼碧葉所在爲祥紫
萼丹跗有形斯慶未聞拱生聖寢聯雲蓋以交光粲擢清時應雒書
而得數洵聖祖文思之極致有以孚茲非陛下儀式之至誠蔑由感
此彼穎川之一葉零陵之五株亦云鄙矣何足尙哉臣草莽下臣芻

蕘賤職鳳樓日麗深慙獻歲之花輦路春香竊比承恩之草恭逢聖
瑞敢頌國華其詞曰粵彼瑤草迄無端倪陽凝陰糅雲蒸露滋五種
締精三秀分歧流焜煌以耀采妙猗儺以伏姿根閭氣而始萌基靈
原而後萸合龜龍以應符非尋常之可期歲維攝提時應應鍾氣肅
宇內日華天東佳哉景陵鬱鬱蔥蔥蘭延隊路松蔭寶塘嘉樹蓊蔚
神耆丰茸乃有芝英矯出乎其中適九本而五色方接葉而連叢有
司遂乃藉以白茅薦以芳褥署以金版封以珠匱雲華共飛雨氣不
宿郁郁芬芬上貢佳淑於是天子乃肅丹陛洞紫宸朝百辟設九賓
拜天庥之蒞止容齊肅而敬申近龍光而增潤襲案香而生溫實深
愜夫聖衷用傳示於羣臣觀其華頂雲映修莖金削若飾藻續若塗
丹牘或璆蒼而紛披或練白而綽灼或連鼓而輪囷或貫珠而錯落
龍蟠屈而結跗連蕤蕤而吐萼肪不截而安凝玉匪剖而誰琢繄何
雪香之霏微電華之煜爚哉審眎厥數則九枝爛如榦分葩疊掩映

扶疏違六進八蓋有故乎臣聞之聖道符乾帝德載坤嘗避盈以示
謙每致變以盡神故神芝之應也二氣交敷默契夫天德之用五行
周匝隱叶於洪範之文良非宅瀛海之中體陽剛之純者烏能致之
若夫澤草木於垌野養耆老於膠庠示休徵於孝武著德應於宣皇
麗甘泉之殿側茁涵德之池陽籍文獻以金冊播絃歌以芝房雖禮
殷而樂備如道狹而德涼曷若我皇赫赫明明具自然之招乎孝思
不匱躬倡天下讓天尊親黽勉夙夜心以心承治以治化日月之和
藉景風而益宣天地之德緣靈雨而滋大善紹述以格歆遂感召而
憑藉是以茲草託聖祖之寢宮而厥數視神堯之中夏也若乃旁德
之徵餘光所兆天不愛道地不愛寶華平賓連紫脫朱草書契之所
靡聞山海之所未造固已冒文囿而續紛集軒庭而繆繞者久矣於
是羣臣咸拜手稽首颺言曰珍符瑰異隆乎上古方之叔世曾不足
數請布中外暨左右史永昭聖烈用答天祐爰作頌曰於赫聖祖極

乾量兮於穆我皇裕明兩兮譁譁九芝昭靈貺兮帝曰匪予皇考允當兮明禋勝蠻其告景命兮左右之謚保長王兮施及無疆德靡尙兮小臣祝斯敢以爲諒兮

擬西征凱旋賦

有序

西夷負固扞格王命數易星紀矣十有三年春智力窮竭納款請服皇帝受之詔勿采入矜愚頑也皇帝制勝廟廊之上御轡萬里之外奮不猛之威布無言之化卒使鳴義狼顧稽顙鄉闕無遠弗屆信乎斯言方之凶黎之誅丹浦之戰三苗之征鬼方之伐義或同科仁不逮茲乎臣埴蠅竄蚓品數卑狹無班揚鴻麗之才衍爽捷給之辯汙池濯錦弱莛擊鐘欲以昭至文發洪響難矣然休風鼓吹草野有聞輒忘固陋樂宣聖治其詞曰

維皇德之赫曦兮誕膺籙而受圖秉顯懿而得一兮固帝眷之所紆曄列聖之齊致兮功五躡而三模繼我皇之欽明兮昭重光於天衢

函蓋天地沐浴日月兮陰靡不旣陽靡不敷指掌九垓几席八紘兮
又何血氣之有未孚乃有蠢爾載靈頑物不化西陲恃遠漢郡比大
黠鼠跳梁天鳥時夜皇道蕩蕩綽其好生兮思遠馭而長駕天狼森
芒以屈彊兮庸迴威弧而不射於是天怒震王誅移簡方召命牧稽
建大麾飭六師是類是禡卜日命龜殷殷麟麟嘽嘽燁燁霆擊雷奮
森舉風馳騎揮霍以虎躍兮旗蜿蜒以龍飛杖馬箠而可下兮劍不
足以一搗曾不浹旬而逾金城超青海壘塹之所及直壓其國埤焉
若乃高牙矗中軍和四關偏伍彌縫鸛鵝布列八尾積卒參連壘壁
藏九地以攝機蓄積水以待決燭乎如霜曜之不可瞬邈乎如至陰
之不可測也至若戈鋌林比旗旒雲鋪螯弧結棧鏐胡屈盧公矛闔
戟長鍛大爰光則焱焱炎炎兮氣則慘栗而不舒其犀利鈇剡飛鳥
曾莫之敢嬰兮又何水陸之足殊乎重以烏號之弓黃闐之弩赤羽
之矰青石之鏃一發而逾西霜之山其餘勁遺力猶足以貫七札穿